

## پولس و برنابا قونیہ شہر میان

۱۴

۱ قونیہ میانم پولس و برنابا بہ کنیسہ یٰ یهودیان بوشویدی و ایجور  
جہ خدا کلام گب زہیدی کی مردومان زیادہ جہ یهودیان و  
غیر یهودیان ایمان باوردیدی. ۲ ولی یهودیانی کی ایمان ناوردہ بید، غیر یهودیان  
تحریک کودیدی و اوشان فکر بر ضد ایمانداران خراب کودیدی. ۳ پس پولس و  
برنابا زمان زیادہ یٰ اوہہ بیسہ بیدی و شجاعت امرأ در مورد خوداوند عیسی مسیح  
گب زہیدی. خوداوند اوشان قوت انجام آیات و معجزات فدیی و خو کلام فیض  
تأید کودی. ۴ او شہر مردوم دو دستہ بوبوستیدی؛ ایتا دستہ جہ یهودیان طرفداری  
کودیدی، ایتا دستہ ہم رسولان طرفدار بید. ۵ وختی یهودیان و غیر یهودیان، خوشان  
قوم پیلہ دانہ آدمان امرأ ہمدس بوبوستیدی کی پولس و برنابای اذیت و آزار و  
سنگسار بوکونید، ۶ اوشان واخبر بوبوستیدی، بہ لیکائونہ شہران، یعنی لسٹرہ و دربہ  
و اون اطراف، فرار بوکودیدی ۷ و اوہہ خودا کلام بشارت دید.

## پولس و برنابا لسٹرہ و دربہ شہران میان

۸ لسٹرہ میان ایتا مردای شل مادرزاد نیشہ بو کی نتانستی خو پایان تکان بدہ و  
ہرگز راہ نوشو بو. ۹ وختی کی پولس جہ خودا کلام گفتن دبو، اون پولس گبان  
حُب گوش دیی. پولس کی بیدہ اون گبان دقت امرأ گوش دتن درہ، بفہمستہ کی

اون ایمان دآره کی تآنه شفا پیدا بوکونه. ۱۰ پس صدای بلند امرأ اون بوگفته: «ویریز تی پایان سر به پا بیس!» اون هو موقع جه خو جا سر ویریشته، به راه دکفته.

۱۱ وختی مردوم، اونچی کی پولس انجام بده بو بیدهیدی، به خوشان زبان لیکائونی فریاد بزهیدی: «خودایان انسان مانستن بوبوستیدی، امی وستی بیجیر بمویدی!» ۱۲ اوشان برنابای «زئوس»، رئیس خوشان خودایان، دانستیدی و پولسم کی بهتر تانستی گب بزنه، «هرمس» کی اوشان سخنگوی خودایان بو. ۱۳ کاهن زئوس کی اون معبد بیرون شهر دروازه نهه بو، چندتا نر گاب و چندتا تاج گل مردوم امرأ باوردیدی شهر دروازه دورونی تا پولس و برنابا ره قربانی بوکونید چونکی اوشان خوشان خودا دانستیدی.

۱۴ وختی برنابا و پولس بیشنوستیدی، خوشان لیاسان چاک بزهیدی، بودووستیدی مردوم میان و فریاد بزهیدی، بوگفتیدی: ۱۵ «ای مردومان، چره آکار کونیدی؟ امانم شیمی مانستن انسانیم و شمر بشارت دئن دریم کی جه ابٹان پوچ دس بکشید و به خودای زنده رو باورید کی آسمان و زمین و دریا و هر اونچی کی اوشان میان نهه خلق بوکوده. ۱۶ خودا در گذشته اجازه بده کی تومام قومان غیریهودی هر کدام خوشان رای بیشید. ۱۷ خودا خو خرم کاران مره خو وجود همیشه ثابت بوکوده و خو رحمت امرأ آسمان جا شمر واران، فصلان پور محصول و خوراک فراوان فده و شیمی دیلان شادی مره پور کونه.» ۱۸ آخر سر آگبان امرأ، مردوم به زحمت آرام کودیدی کی اوشان ره قربانی نوکونید.

۱۹ ولی بعد اون، یهودیانی جه انطاکیه و قونیه بموییدی، مردوم خوشان امرأ  
همدس بوکودیدی و پولس سنگسار بوکودید. چون خیال بوکودیدی کی بمرده،  
اون فکشه ییدی، ببردیدی بیرون تاوده ییدی. ۲۰ اما وختی ایمانداران اون دور جمع  
بوستیدی، ویریشته و به شهر واگردسته. فردای او روز، اون و برنابا به شهر دربه  
بوشوییدی.